

Johannes Flury – nov president

(anr) A chaschun da la radunanza da commembers da la Pro Raetia a Soloturn è Johannes Flury, rector da la Scola auta da pedagogia, Cuira, vegnì tschernì sco nov president. El era daventà già avant in onn commember dal comite central. Cun l'entschatta da 2014 surpiglia el il presidi da la Pro Raetia sco successur dad Andreas von Sprecher. La Lia Rumantscha è represchentada da nov tras Jon Carl Tall, Zug, en il comite central.

Dieta champestra davart multilinguissem

L'usitada dieta champestra da la Pro Raetia ha lieu quest onn ils 21 e 22 da settember a Puschlav. En il center stat il «Plurilinguissem sco plivalur», in tema tant debattà sco amà en il Grischun. A la maisa radunda vegnan personalitads grischunas, che stattan en stretg contact cun il plurilingussem vivì e s'engaschan era persunter, a pled. Per la Pro Raetia èn ils trais

linguatgs chantunals in element indispensabel da coesiun ed instrument efficaci per favorir tantas activitads commercialas ed economicas.

La Pro Raetia è cunscenta da la ritgezza cun mantegnair il multilinguissem en il Grischun e sa che la giuventetgna, creschida si en in ambient multilinguistic, ha gronds avantatgs per sa cumprovar sin tuts secturs da lur vita.